

Parosifa kuisow fain Pol-ke wi Tesalonaika wia siisimomak

Miimow opora

Masedonia kame owow maneka Tesalonaika. Iir nain Pol Filipai-pa ikok Tesalonaika ikiwep Yeesus opor eliwa wia maakeya wi Kristen aremik (Aposel 17.19). Ne wi Yuuda nan ikemik nain-ke naap urufap Pol kema bagiwirap samoru naep onamik. Naeya o baurarep Korin-pa nan ikua. Nan ikaeya ona uuwow epaskun Timoti-ke ikiwep wi Tesalonaika Kristen teeria sira kamenap onamik nain Pol maakek.

Pol naap miimap wi Tesalonaika parosifa wia siisimomak, opora-pa kema wia kekanowamkun wi Mua Maneka opora baliwep opuk naep. Wi amis mua-ke feenap maimik, Pol wi Kristen teeria kame unowa nain parosifa me wia siisimomowa ikok kiikir akena wi Tesalonaika parosifa wia siisimomak.

Wi Tesalonaika Kristen teeria Krai ikoka ekapowa nain nokarowa unowa wiar ikua. Naapeya Pol-ke feenap siisimok, yiena Maneka Yeesus ekapowa nain ekapinon, ni sira eliwa ookami o ekapowa nain kemaiw ikok arewap ikeka, naap wia maakek.

1 ¹ Aria i yiam arow, Pol, Sailas ne Timoti, i naap parosifa fain ni Tesalonaika nia siisimomimik, ni eena yiena Auwa Mua Maneka ne yiena Maneka Yeesus Krai teeria-pa wiar ikeman nain. Feenap nia naimik, wi nia kemalep nia asipam-ikaiwkin ni kema sonom eliwiw ikowen.

Wi Yeesus opora kekanowa opap kakeniw ikemik

²⁻³ Aria i sira fain niar kema suuwimik, ni kekanep Yeesus opora opiman nain, ne mua wia kookalep uuwowa oniman nain pun. Ne oko pun feenap, yiena Maneka Yeesus Krai ekapowa nain kemaiw tuupam-ikok ni kekanep opora opiman. I iiwawun nain niar kema suuwap nia maemi yiena Auwa Mua Maneka faremi sira eliwa naakimik.

⁴⁻⁵ Emar unowik, i iiriw Yeesus opor eliwa nia maakemik nain me opora muutiw nia maakemik, weetak. Ewar Eliwa kekanowa-pa maa

miililina unowa nia ofakowamik. Nain-ke kema nia kiripeya opor makena-ke wiar naep ookaman. Naapeya i nain amisarep maemik, pepep, Mua Maneka ona iiriw nia kookalep nia nanikak. Ne i iiriw ni niamiya ikemik nain ni baliwep ikeka naep sira kamenap nia onam-ikemik nain yiar amisareman. ⁶Naeya i sira yiokami yiena Maneka sira pun wiar ookaman. Makena, ni sirirowa unow akena niem-ikemik, nain Ewar Eliwa-ke kemelowa nieya ni kemelowiw opora nain miimap yiar opaman.

⁷Naapeya wi Yeesus Krai teeria Masedonia ne Akaiya kame-pa ikemik nain, sira unowa nain niar urufap ni sira niokimik. ⁸Moram ni yiena Maneka opor eliwa wiar opaman nain, nain-ke manekareya wi Masedonia ne wi Akaiya pun aawemik. Ne me wi muutiw miimamik, weetak. Owow unowa pun niar miimap maimik, “Wi Mua Maneka opora baliwep wiar opimik,” naap nia maimik. Naapeya i wiar ikiwimik nain ni nia maemi wia nanaromowa nain wi iiriw nia amisaremik. ⁹Ne wis-keriw feenap yia maakimik, i iiriw niar ikiwemik nain ni baliwep yia aawep opora yia miimaman. Ne ni miw inasina ookam-ikeman nain mikikira wiemi Mua Maneka ookaman, eena makena ne anane ikaiya nain. Naemi uuwowa onomaman. ¹⁰Ne ona Muuka iinan-pa oraiya nain arewap ikeman, eena umeya Mua Maneka ona iikirowak nain. Muuka nain-ke yia aaweya Mua Maneka wiimar bagiauw yia ofakowowa maek nain me urufiyen. Wi nain iiwawun yia nanaromamik.

Pol Tesalonaika-pa uuwowa onak nain wame maek

2 ¹Aria emar unowik, ni baliwep amisareman, i eena ikiwep ni niamiya ikok uuwamik nain uuwowa kua-pa me yiar arek. ²Ni yia amisareman, i iiriw Filipai-pa ikemik nain yia firekami sirirowa yiemik. Ne nan ikok ni niar ikiwemik. Nain pun naap, i uuwam-ikemkun mua papako-ke yia samo-samorami uuwowa yiar pu-puukam-ikemik. Nain Mua Maneka-ke yia asipami yia kekanoweya ona opor eliwa nia maakemik. ³Moram ni Yeesus opora wiar opaka naep nia maakemik nain i sira samora me ookami nia maakemik, ne wadolalemi me nia peeskimemik, weetak. ⁴I Mua Maneka ona iiriw yia akimap mua eliwa-ke yia naep Yeesus Krai opor eliwa wia maakowa uuwowa nain yiek. I naap uuwimik. Naeya wi mua kookalowa me wiokimik, weetak. I Mua Maneka kookalowa ookimik, eena yia akimami kema yia pupiya nain. ⁵Ni yia amisareman, i opor afila-ko me nia onamik, ne maa niar mufu naep me nia peeskimemik, weetak. Mua Maneka pun makena yia naiya. ⁶Wi unuma yia purupuk, naap me maimik. Naapeya ni unuma yia purupeka me nia naimik, weetak. Wi mua papako pun wia.

⁷Ne i Krai aposel-ke naemi ni maa-ko yia asipeka naep mia nia teekam-ikekamik. Nain i naap me onamik, weetak. I nia saalolokam-

ikemik, wi emeria eena muuka wia saalokokimik naap. ⁸I manek akena nia kookalep, emawik, emar eliwa nia naimik. Naapeya i kemelap Yeesus Krai opor eliwa nia maakemi uurarow marew nia asipam-ikemik. ⁹Aria makena, ni fain yiar kema suuwiman nia naimik. Feenap, i muuta-ko me uurarem-ikemik, anane uura ne amirika naap oospem-ikemik. I mia me nia teeku naep wapena ekekiarem-ikemik, feenap, i Yeesus Krai opor eliwa nia maakemi yiena maa enowa uuwowa nain pun onam-ikemik.

¹⁰I niamiya ikemik nain opor makena nia maakemi sira kakeniw onam-ikemik. Nain nis-ke yia ane-kekanowami eliw wia maakowen, ne Mua Maneka pun naap yia ane-kekanowinon. ¹¹⁻¹²Ne fain pun yiar amisareman. I nia kekanowami nia kakenam-ikemik, wiawi eena muuka wia saliwami suule baliwep wiiya naap. Ne Mua Maneka nia fareya o pika kema-na-pa ikok o parina-pa wiar ikeman. I muut nain nia maakem-ikemik, “Ni Mua Maneka kookalowa ookami baliwep ikeka,” naap maimik.

¹³Mua Maneka opora nia maakemkun wiar opaman nain me wi mua opora-ke wiar naeman, weetak. Makena, opora nain Mua Maneka opora-ke. Ne opor makena nain-ke ni kema-pa niar uuwam-ikaiya. Naapeya i nain naep anane Mua Maneka sira eliwa naakimik. ¹⁴Emar unowik, wi Yuudia kame Yeesus Krai teeria wiena owow epaskun-ke sirirowa wiimik. Nis pun, niena owow epaskun mua papako-ke naap nia onimik. Naapeya ni sirirowa aawiman nain wi saarik. ¹⁵Wi Yuuda-na wiena owow epaskun eena iiriw profet nain wia ifakimem-ikemik. Ne yiena Maneka Yeesus pun ifakimemik. Ne aakisa is pun i owow unowa ikiwimik nain yia samo-samorami yia iirarem-ikemik. Wi naap onimik nain Mua Maneka kema bagiwirowimik, ne mua wia iiwuarimik. ¹⁶Mua Maneka opora owow unowa wiar ikiwemi wia maakowa nain era yiar puukimik, eena Mua Maneka wia aawowa opora nain. Wi pina naap oni-ikiwemi wiena pina ane-kurumami iiwawun tauwat opamik. Naapeya maken akena, wi Mua Maneka bagiaw wiar urufikuan.

Pol ikiwep nainiw wia urufowa maek

¹⁷Emar unowik, i ni niamiya ikemkun wis-ke yia iirariwkin ekapep fan ikemik. Makena, i fan ikemik nain epa me ekamik, nain i manek akena nia kema suuwam-ikaimik. I kirep ikip nia urufowa nain kema manek akena nia tuupam-ikok era akupowa uufunimik. ¹⁸I kirep ikiwep ni nia urufu naep onimik. Yos-ke makena, ni niar ikiwowa nain akimowa unowa arem-na wia. Satan-ke era yiar puukam-ikaiya. ¹⁹I manek akena nia kema suuwimik. Moram wiimar yiena Maneka Yeesus nainiw ekapiya nain i o miira-pa wiar iimarep i uuwowa eliwa onam-ikemik nain maa mauwa o ofakowiyen? Ni naneka, ni nain ikoka o ofakowiyen. Nis-pa i maa makena urufami manek akena kemeliyen. Ne ni muuta nain i

palaniyen. ²⁰Makena ni muuta nain i unum maneka aawep manek akena kemelimik.

Wi wia kekanowowa naep Pol-ke Timoti sesekak

3 ¹⁻²Aria i nia urufowa kema samor maneka ikemik. Naapeya maemik, Timoti sesekamkun neek wiar ikiwinok, ne i iisow Atens-pa feekeriw ikaiyen naimik. Naap maep o sesekamik. Os pun uuwowa fain yiamiya uuwam-miok Kraiss opor eliwa wia maakem-miawiya. Ni Kraiss opora baliwep opaka naep os-ke niar ikiwemi nia kekanowinok naemik. ³Naeya nia samo-samorimik nain ni kema unu-unowa me wuowen. Moram ni amisareman, sirirowa sira naap nain i aawem-ikowa-ke. ⁴I iiriw ni niamiya ikok nia maakem-ikemik, i unowiya sirirowa aawiyen. Ne ni aakisa pepeka amisareman, i sirirowa aawem-ikaimik. ⁵Oko Satan-ke sira papako-pa nia mufeya i niamiya ikok uuwamik nain iiwawun yiar orainon. Ni opora opam-ikaiman-i e weetak, yo nain kema suuwam, weetakeya Timoti sesekam, ikip nia urufinok naep.

Timoti-ke wia kekanowak

⁶Ne Timoti ikiwep ni niar iki-ikok ekapemi opor eliwa fain yia pekapomak. Feenap maek, wi kekanep opora opam-ikaimik, ne mua oko wia kookalem-ikaimik, naap nia maek. Neemi fain pun yia maakek, i manek akena kema yia suuwiman nain, ne nainiw-ko yia urufu naep kemaiw tuupam-ikaiman, i nia urufowa maimik naap, opora naap yia maakek. ⁷Makena, i sirirowa sira-sira aawimik. Nain ni Kraiss opora baliwep opiwkin i muut nain kekanep naap ikemik. ⁸Ne ni kekanep yiena Maneka wiar ikeman, naapeya i kema tenep palanowiw ikemik. ⁹Ni muuta nain i Mua Maneka mokoka-pa manek akena kemelimik. Kemelap maimik, "Aa, Mua Maneka sira eliw oram. Sira eliwa naimik nain i me pepeka. Kamenap maiyen." ¹⁰I nia urufu naep anane amirika ne uura naap Mua Maneka faremi nokarimik, era-ko yia imenomaya niar ikiwowa nain. Ikiwemi ni Yeesus Kraiss ookami opora papako baliwep me amisareman nain nia maakemi kema nia kekanowiyen naep.

¹¹Aria yo feenap maiyem, yiena Auwa Mua Maneka ne yiena Maneka Yeesus naap era-ko yia wuomiwkin ni niar ikiwiyen naimik. ¹²Ne pun yiena Maneka faremi fain nokarimik, nia asipam-ikaeya ni niam kookaliman nain manek akena niam kookalem-ikowen. Ne mua oko pun naap wia kookalem-ikowen, i manek akena nia kookalimik naap. ¹³Ne os-ke kema nia kekanowam-ikaeya ni kekanep ikowen. Ni naap ikaiwkin ikoka yiena Maneka Yeesus ona teeria unowiya ekapimik nain Mua Maneka mokoka-pa ni pina marew, dubil manekiw ikowen.

Mua Maneka i sira eliwa nain yia kookaliya

4 ¹Aria emar unowik, Mua Maneka kookalowa wiar ookowa sira unowa nain suule iiriw niemik. Makena, ni aakisa opora yiokami

naap ikeman, nain i aakisa yiena Maneka Yeesus unuma-pa opor kekanowa nia maakimik, ni sira nain me piipueka, anane naap onam-ikaiwkin sira nain niar manekarinok. ²Moram yiena Maneka Yeesus unuma-pa i opor unowa iiriw nia maakemkun amisareman.

³Mua Maneka ni pina marew, dubil manekiw ikeka nia naiya. Feenap, uruw mia me ululkoweke. ⁴Ni mua uruw mia baliwep niam kaikap sira eliwa ne sira makena-pa ikeka. ⁵Wi sisin mua Mua Maneka me ookimik nain uruw mia me wiam kaikimik. Wi nain sira me wiokeka. ⁶Wi mua naap nain ikoka yiena Maneka-ke wia kiripomami sirirowa samor akena wiinon. Ni kakeniw ikeka, niena teeria mua oko emeria me wiar mufeka, mua emeria pokow eliwa me wiar samoreka. Opora nain i iiriw opor kekanowiw ariman nia maakemi maemik. ⁷Moram Mua Maneka yia fareya ona teeria-pa wiar ikemik nain me sira samora onowa-ke, weetak. Yena teeria-pa ikok sira eliwa-pa ikeka naep yia naiya. ⁸Naapeya wi mua eena i opora yiar fienimik nain me i mua oram fain opora yiar fienimik, weetak, Mua Maneka eena Ewar Eliwa yiiya nain opora wiar fienimik.

⁹Aria ni Mua Maneka teeria-pa ikeman nain niam kookalow sira nain Mua Maneka ona iiriw nia ofakowak. Naapeya i nainiw nia maa-maakep me naem-ikaiyen. ¹⁰Makena, ni wi Kristen teeria Masedonia owow unowa-pa ikemik nain wia kookaliman. Nain ni naap akena onam-ikeka nia naimik. Naeya sira nain niar manekarem-ikainok.

¹¹I iiriw nia maakemik naap ikeka. Feenap, ni me paapar-yiaweka, kekelka ikok niena uuwowa baliwep oneka. Ne niena wapena-pa uuwami maa muutitik pepekerowen. ¹²Naeya ni mua oko maa-pa me wiar kekanep ikowen. Ni naap oniwwin wi sisin mua sira niar urufap ekima nia opikuan.

Yeesus nainiw ekapinon

¹³Aria emar unowik, wi mua iiriw umemik nain ikoka kamenap arikuan nain momora me ikeka naep nia maakimik. Feenap, wi sisin mua Mua Maneka me ookimik nain umep iiwawun mesenalikuan. Wiena teeria mua oko umiwkin kema iiwawun fufurarimik. Oko nis pun naap niena teeria wi iiriw umemik nain kema wia wiisarem-ikowen. ¹⁴Naapeya i feenap nia maakimik, Yeesus umep ikok iikirak nain i makena-ke naimik. Naemi maimik, makena, wi eena o teeria-pa ikok iiriw umemik nain ikoka Mua Maneka-ke Yeesus miiwa poromi wis pun wia iikirowap o wameiya wia pekapinon. ¹⁵Ne aakisa yiena Maneka eena maek nain ookami nia maakimik, i mokok enuma ikemkun o ekapinon-na is-ke wi iiriw umemik nain wia nomakep me miimep iinan urupiyen, weetak. ¹⁶Feenap arinon, iir nain yiena Maneka iinan-pa oromi kerew akena farinon. Ensel woos mua pun kerew farinon, ne Mua Maneka puuw wiar aluinion. Iir kuisow maa nain imenareya wi eena iiriw Yeesus

opora wiar opam-ikok umemik nain kiikir iikirikuan. ¹⁷Wi iikiriwkin i mokok enuma ikemik fain Mua Maneka-ke unowiya yia aawep iinan yia amapurupeya aapereka iinan-pa yiena Maneka mirowiyen. Mirowap o wameiya ikaiyen, anane maneka. ¹⁸Naapeya ni opora fainiw aakunemi kema niam iikirowam-ikeka.

Yiena Maneka ekapowa nain arewam-ikaiyen

5 ¹Aria emar unowik, yiena Maneka ekapowa nain fofa ne ama amisarowa nain i me nia maakiyen. ²Moram ni feenap amisareman, o ekapowa nain ikum mua uura ekapimik naap akena ekapinon, oram yia soranowap-puinon. ³Aria wi momora ikok maem-ikaikuan, “Aa aakisa i epa eliwa-pa ikemik, maa keker opowa marew, irakowa marew.” Wi maep naap ikaiwkin maa samora feekeriw imenaremi wia samorinon. Ne wi baurarowa me pepepek, wi emeria eena muukaru naep sirirowa maneka feekeriw wiar imenariya naap.

⁴Nain ni kokoma-pa me ikeman. Naapeya fofa nain imenareya ni me soranowen, weetak, wi momor ikaiwkin ikum mua ekapiwkin soranimik naap. ⁵I me uura epa kokoma-pa ikemik naap. Ni unowa nain amirik maneka-pa ikowa saarik, parina-pa ikeman. ⁶Naapeya wi papako saarik me inep ikaikua. Neemi i palanow manekiw ikok maa baliwep kema suuwam-ikaikua. ⁷Uura-na wi inimik ne eka kekanowa enep momorarem-miawimik, epa nain-ke. ⁸Ne i eena amirik parina-pa ikemik nain i maa kema suuwam-ikaikua. Naeya Yeesus Krai opora wiar opam-ikok mua wia kookalem-ikaikua, nain tapi wuap ikowa saarik. Ne Yeesus Krai yia aaweya eliw ikemik, nain irakow tapala kekanowa saarik ikiwosa-pa wuap kema manekiw ikaikua. ⁹Moram Mua Maneka yia nanikak nain bagiaw wiar urufowa nain me yia nanikak, weetak. Yiena Maneka Yeesus Krai wia aaweya eliw ikauk naep yia nanikak. ¹⁰O i muuta nain umok, naeya i mokok enuma ikemik fain o wameiya ikemik, ne umiyen pun naap, o wameiya ikaiyen. ¹¹Naapeya ni aakisa niam kekanowami kema niam iikirowam-ikaiman nain naap akena oni-ikiweka.

Opora papako

¹²Aria emar unowik, feenap oneka nia naimik, wi iimarow mua eena uuwow yoowa nia uuwomimik nain ekima wia opaka. Wi yiena Maneka-ke wia pepekimeya ni nia kakenami suule niu naep onimik, wi nain-ke. ¹³Wi uuwow maneka opimik, naapeya ekima wia opa-afureka, ne wia tetareka. Ni unowiya kema kuisow ikeka.

¹⁴Ne feenap oneka nia naimik, wi mua lebuma oram yiwimik nain ifana wiareka. Ne wi Yeesus Krai ookowa kema pinarimik nain wia kekanoweka. Wi mua pina-pa wakiemik nain wia ane-suuweka. Ni unowiya kekelka niam wuami niam saliweka. ¹⁵Pina nia oniwwin-na

muuna me urureka. Ne sira eliwa onami mua oko pun saria wieka. Ni nain kemaiw ikok naap onam-ikeka.

¹⁶Ni kemelow manekiw ikeka. ¹⁷Mua Maneka anane farem-ikeka. ¹⁸Maa samora e maa eliwa niar imenareya Mua Maneka sira eliwa muutiw naakem-ikeka. Moram ni Yeesus Krai teeria-pa ikeman nain Mua Maneka ni naap oneka nia naiya. ¹⁹Ni Ewar Eliwa kema niiya nain naap oneka, me wiar puukeka. ²⁰Wi Mua Maneka opor kokosa ariman wiar maimik nain me wiar firekeka. ²¹Ne maa unowa aakunimik nain wiar pupep eliwa nain opaka. ²²Ne sira samo-samora onowa nain iiwawun mikikira iweka.

²³I feenap nia naimik, Mua Maneka eena anane kema yia sonomiya nain nia asipeya ni kema ne sira iiwawun dubil manekiw ikowen. Naeya ni naap ikok niena ewar, kukusa ne niena mia pun iiwawun pina marew ikainok, ikip iiwawun yiena Maneka Yeesus Krai nainiw ekapowa-pa. ²⁴O eena nia fariya nain makena-ke, naapeya maa maek nain naap oninon.

²⁵Emar unowik, nis pun Mua Maneka fariwkin yia asipinok naep nia maakimik. ²⁶Ni Mua Maneka teeria unowiya sira eliwa-pa wapena niam opaka. ²⁷Yo yiena Maneka unuma-pa opor kekanowa nia maakiyem, ni parosifa fain aawep wi Mua Maneka teeria unowa nain wia unufomaka.

²⁸Aria yiena Maneka Yeesus Krai nia kemalep nia asipam-ikaeya ni eliw manekiw ikowen, naap nia naimik.